



## Communicaziun a las medias

Bern 18.02.2021

---

### **Cusseglial federal Ignazio Cassis lantscha ensemen cun la Regenza grischuna l'emprima «Emna rumantscha» en la rait a l'exteriur**

**«Rumantsch: in ferm toc Svizra». Tenor questa devisa lantscha il Departament federal d'affars exteriurs (DFAE) l'emprima emna deditgada al rumantsch en Svizra ed a l'exteriur. Ils 19 da favrer 2021 envida cusseglier federal Ignazio Cassis, en collavuraziun cun il chantun Grischun e Radiotelevisiun Svizra Rumantscha (RTR), ad in event online davart la quarta lingua naziunala da la Svizra. La finamira dal DFAE e da las represchentanzas svizras a l'ester è da render pli enconusentas la lingua e la cultura rumantscha che contribueschan omaduas fermamain a la coesiun naziunala da noss pajais.**

Ils 20 da favrer 1938 è ina data istorica per la plurilinguitad svizra. Quel di è il rumantsch vegnì renconuschì uffizialmain sco quarta lingua naziunala – cun ils medems dretgs sco il tudestg, franzos e talian. Il DFAE ha tschernì questa data simbolica per lantschar l'emprima «Emna rumantscha». L'emna da la lingua rumantscha cumplettescha ils «Dis dal plurilinguisssem» e las occurrenzas en il rom da la «Settimana della lingua italiana nel mondo» e da la «Semaine de la francophonie». Ils events duain suttastritgar l'impurtanza da la plurilinguitad per la coesiun naziunala, però era per l'avertadad vers anora.

L'idea da realisar in'emna rumantscha è vegnida discutada avant dus onns a chaschun dal giubileum da 100 onns Lia Rumantscha a Zuoz. Il project che vegn sustegnì da cusseglier federal Ignazio Cassis è sa sviluprà en il rom d'ina collavuraziun da differents acturs en Svizra ed a l'exteriur. «La Svizra sa cumpona da numerusas identitads e culturas che vivan paschaivlamain da cuminanza. Il rumantsch è ina part fundamentala da quai. La plurilinguitad e la diversitad èn ina sfida ed ina ritgezza enina. Ellas mussan a nus da schliar conflicts en il dialog in cun l'auter, ina qualitat svizra fitg dumandada en il mund», accentuescha cusseglier federal Ignazio Cassis.

### **In'occurrenza online per la cultura rumantscha**

La stretga collavuraziun cun differents partenaris, tranter auter cun il chantun Grischun e la Lia Rumantscha, sa manifestescha cleramain a chaschun da la lantschada da l'occurrenza ils 19 da favrer 2021 (11:45-13:00, live sin [www.rtr.ch](http://www.rtr.ch)). Persunas da Berna, da la Rumantschia e da l'exteriur tschertgan respostas a la dumonda: Pertge è il rumantsch «in ferm toc Svizra»? Cusseglia federal Ignazio Cassis ed il president da la Regenza grischuna Mario Cavigelli discuteschan virtualmain cun scolaras e scolars da la scola secundara da Glion e prendan alura part da la runda da discussiun online cun cusseglier guvernativ Jon Domenic Parolini ed ulteriurs represchentants da la lingua rumantscha ch'èn activs en differents secturs. Da vesair èn ultra da quai era messadis per video da Chasper Sarott, ambassadur svizzer a Madagascar, ed Aita Pult, diplomata a New York.

### **Contribuziun da las represchentanzas svizras a l'ester**

La «Emna rumantscha» dat la chaschun da metter en il center la plurilinguitad svizra. Istorgias e fatschas da la Svizra rumantscha, intervistas, curs da lingua, prelecziuns, videos, inscunters virtuals: las represchentanzas svizras a l'ester realiseschan, resguardond las mesiras da Covid-19, en lur pajais respectivs occurrenzas che rendan pli enconuschentas la lingua e la cultura rumantscha. «Nus ans distinguain en la diplomazia gist tras nossa experientscha cumprovada da far viver ensemen paschaivlamain las differentas identitads e culturas», punctuescha cusseglier federal Ignazio Cassis. «Nus purschain questa savida sin il plaun internaziunal cun noss buns servetschs e nossas cumpetenzas d'intermediar. La Svizra è perquai in'actura impurtanta en favur da la pasch, dals dretgs umans e da la segirezza en il mund.»

### **DFAE – plurilinguitad e dialog intercultural**

La promoziun da las linguas minoritaras en Svizra fa era part dal dialog politic cuntinuant e structurà ch'il schef dal DFAE maina cun ils chantuns Grischun e Tessin.

A l'exteriur è la Svizra preschenta cun var 170 represchentanzas e circa 2300 collavuraturas e collavuratur. La diversitad da las linguas discurrendas, ultra da las linguas naziunalas da la Svizra, è enorma. La promoziun dal dialog intercultural è damai in punct central da la diplomazia svizra.

Il livestream da l'occurrenza dals 19 da favrer 2021 chattais Vos sin [www.rtr.ch](http://www.rtr.ch)